

Mursyidul am PAS tolak kerjasama jatuhkan Najib
Free Malaysia Today
Okt 21, 2016
Zulkifli Sulong

Ucapan pertama Hashim Jasin sebagai mursyidul am dengan jelas tidak mahu bersekongkol dengan pihak yang mahu menjatuhkan perdana menteri.

KOTA BHARU: Mursyidul Am PAS Hashim Jasin semalam menolak sebarang bentuk kerjasama dengan pihak yang mahu menukar kerajaan pimpinan Datuk Seri Najib Razak dan menggantikannya dengan perdana menteri yang baharu.

Hashim, dalam ucapan sulung di Kelantan selepas baru 2 minggu dilantik menerajui jawatan tertinggi PAS itu, berkata parti itu sudah membuat pelbagai jenis kerjasama sebelum ini dan terbukti ia tidak memberikan hasil.

“Ada parti baharu ajak kita bersatu bagi membolehkan 1 lawan 1 untuk menjamin kemenangan. Itu nak ambil kira mudah saja,” kata Hashim, dipercayai merujuk usaha PKR dan Parti Pribumi Bersatu Malaysia (PPBM) pimpinan Tan Sri Muhyiddin Yassin untuk mendekati PAS bagi memastikan tiada pertindihan kerusi dalam kalangan pembangkang menghadapi Barisan Nasional (BN) pada pilihan raya umum akan datang.

Baru-baru ini, Pengerusi PPBM Tun Dr Mahathir Mohamad berkata hanya 1 cara sahaja BN boleh dikalahkan iaitu dengan menggunakan 1 simbol, 1 manifesto dan 1 calon melawan BN.

“Semua parti pembangkang mesti bersatu dengan menggunakan 1 simbol, 1 manifesto, 1 calon untuk mengalahkan Umno-BN,” kata Dr Mahathir di Shah Alam minggu lalu.

Hashim berkata PAS menolak sebarang kerjasama semata-mata untuk menukar kerajaan yang ada atau menggantikan perdana menteri.

“Kamu ajak kami berpadu, nak tukar kerajaan, nak ganti PM. Saya nak kata, kami tak boleh terima. Dulu kami dah cuba macam-macam, masuk dalam BN, kemudian berpakat dengan pembangkang, semua tak jadi,” katanya dalam majlis sambutan 26 tahun Kerajaan Kelantan di bawah PAS, di Kota Bharu, malam tadi.

Pada awal 1990-an, PAS pernah bekerjasama dengan Parti Melayu Semangat 46 di bawah Angkatan Perpaduan Ummah, gabungan yang dipimpin Tengku Razaleigh Hamzah, sebelum beliau membubarkan parti itu. Selepas 2008, PAS turut serta dengan PKR dan DAP di bawah Pakatan Rakyat, gabungan dipimpin Datuk Seri Anwar Ibrahim, yang ditamatkan selepas pertikaman lidah PAS-DAP mengenai usaha memperkenalkan hudud.

Hashim berkata PAS tidak mahu lagi terus menjadi pengikut kepada mana-mana pihak kerana ia mahu menjadi pemimpin, bukan dipimpin.

“PAS tak boleh dah bagi orang lain duduk depan, orang dok pimpin kita, kita kena jadi pemimpin, PAS kena jadi pemimpin,” kata bekas pesuruhjaya PAS Perlis itu yang kini merupakan mursyidul am PAS yang ke-4 selepas kematian Datuk Haron Din bulan lalu.

Katanya, PAS tidak kisah kalau ada kumpulan lain yang mahu bersamanya.

“Orang tak ikut tak apa... Kita yakin kalau kita tolong Allah, Allah akan tolong kita,” kata Hashim.

Copyright (C) 2009-2016 MToday News Sdn. Bhd. All Rights Reserved.

Source:

<http://www.freemalaysiatoday.com/category/bahasa/2016/10/21/mursyidul-am-pas-tolak-kerjasama-jatuhkan-najib/>